

դրամներն յանձնելու Հոգաբարձութեան, և եթէ համաձայնի՝ օտար քաղաքացի « Հիմնադիր և Մշտնջենաւոր » անդամների, (որոց մին լինելու պատիւն ունիմ) իրաւացի զայրոյթը չի՞ շարժիլ:

Հրապարակաւ խոստովանումեմ, որ պ. Յակոբ Տէր Խաչատրեանցն ընկերութեան գործի մէջ ինձ հետ առաջին աշխատողն, և ինձ յուսադրողն էր: Ընկերութեան անունով դրամներ հաւաքելու ժամանակին՝ նա էր ինձ հետ անտանելի արգելմունքների հանդիպում: Երբ ընկերութեան դրամներն հասան 800 մանէթի, իմ ժամանակի հոգաբարձուք ևս քանի քանի անգամ ժողովեցին ստանալ ընկերութեան դրամները ուսումնարանի վիճակը բարւոքելու համար. իսկ Պ. Տէր Խաչատրեանը հակառակն էր պնդում Հոգաբարձութեան, ասելով որ, օտար քաղաքներից եկած դրամները յայտնի նպատակ ունին և անշուշտ պէտք է իւր նպատակին ծառայացնել: Յուսով ենք՝ որ պ. Տէր Խաչատրեանցն բարեմիտ անձն լինելով, դարձեալ նոյն համոզմանը հաստատ կրմնայ, մեր հեռաւոր անդամոցս իրաւանցը ջատագով հանդիսանալով, եթէ հարկը պահանջէ, երկրորդ անգամ առաւել մանրամասն և հանգամանօրէն կըխօսեմ:

Միաբան Ս. Էջմիածնի Գրիգորիս Վարդապետ

ԱՅԼ ԵՒ ԱՅԼ-Ք.

Շնորհակալութեամբ ստացանք

Ա. Հ. Խորէն Ծ. Վարդապետ Ստեփանէի խմբագրութեամբ հրատարակուող Մանկավարժանոց ամսատետրակի 1 համարը:

Բովանդակութիւնն է, 1. Մանկավարժանոց և մանկավարժական ուսման անհրաժեշտ կարեւորութիւն: 2. Ազգային լուսաւորութիւն ֆրանսիայում: 3. դպրոցներ զարգարելու, դպրոցական պատկերի և առհասարակ աշակերտների ճաշակը զարգացնելու մասին: 4. Առաջ (բանաստեղծ.), 5 Շարժական Մատենագարան. 6 Իրախօսութիւն փորձնական դաս բեմական դպրոցում: 7. Յիշատակարան. 8. Ծանուցմունք՝ կազմի 3. և 4 երես:

Ամսաթերթը հրատարակուած է Մարտ ամսին, իսկ Յունվար և Փետրվար ամիսների համար բաժանորդներին ուղարկուած է « Համակենտրոնական պրոգրամներ » վերնագրով խմբագրի աշխատասիրած և հրատարակած գրքոյկը:

Բ. Ժամանակաւոր ընդհատումից յետոյ ստացանք Վարժարան մանկավարժական ամսագրի 3. համարը Փետրվար ամսին:

Ստացանք նաև « Կաթուղիկոսական Ընտրելիներ » վերնագրով մի բրոշիւր, հրատարակութիւն Արմենակ Սիւնիի:

Պ. Արմենակ Սիւնին ընդհանրապէս խօսելով մի կաթուղիկոսացուից պահանջուած կատարելութեանց մասին՝ անցնումէ ընտրելիների հա-

մառօտ կենսագրութեան, և վերջացնումէ իւր խորհրդածութիւնը քըն-
նադատելով Պ. Մելիքզադէի կաթուղիկոսական հարցի առթիւ Մշակի
մէջ մի շարք յօդուածները:

Ամսոյս Ցին Զատիկի տօնի օրը Ս. Իջման Տաճարում պատարագեց
Ամեն. Տեղակալ Տէր Մակար Սրբազան Արքեպիսկոպոսը: Ս. Պատարա-
գից յետոյ Նորին Սրբազնութիւնը Վեհարանի դահլիճում ընդունեց
Մայր Աթոռոյս Միաբանութիւնը, Վաղարշապատու քահանաներին,
Դիւանատանց ծառայողներին, Ժողովրդեան առաջաւորներին և ճե-
մարանի ուսուցիչներին:

Նորին Սրբազնութիւնը շնորհաւորեց Յիսուսի Ս. Յարութիւնը բարե-
մաղթութիւններով և օրհնութեամբ արձակեց:

Մայր Աթոռոյս Սինօդի Ատենադպրի պաշտօնի համար ցանկացողք
թող դիմեն Սինօդին, Այդ պաշտօնը ստանձնել կամեցողները պէտքէ
լինին աստիճանաւոր և լաւ գիտենան Ռուսերէն և Հայերէն գրաբառ,
Ռոճիկն է 500 ռուբլ. սեղանի՝ 200 ռուբլ. բնակարանի՝ 150 ռուբլ. գու-
մարն 850 ռուբլի, իսկ պաշտօնը 9 ռդ աստիճանի է:

ՅՈՅՍ.

(Շէլլէր):

Լաւագոյն ապագայ օրերի վերայ
Մարդիկ շատ խօսում և երազում են.
Եւ յուսով լի վազում, շտապում են նորա
Դէպի նպատակը բաղդալից ու ոսկեղէն.
Ծերանումէ աշխարհն, նորից մանկանում,
Բայց մարդն լաւ յոյսը բնաւ չէ կորցնում,
Յոյսն է նորան կեանքի մէջ բերում,
Ուրախ տղային յոյսը գգվումէ.
Յուսոյ հրապոյրն է պատանուն դրաւում,
Ծերունու հետ էլ յոյսը չէ մեռնում,
Յոգնած կեանքի հանգիստ՝ դադարն է մահուան.
Մարդը յոյս է դնում նաեւ նորա վերան,
Յոյսը չէ դատարկ, շողոքորդ մի միտք
Մի մեծ յիմարի ուղեղում ծնուած,
Սրտի խորքից միշտ կանչումէ նա պիրկ,
Թէ մի լաւ բանի համար ենք ծնուած.
Եւ ինչ որ ներքին ձայնն է խօսում,
Յուսացող հոգուն երբէք չէ խաբում:

Մ. Զ.